

## El leon

A S.Donà nel secolo paśà se-vea na spezie de piccolo źoo – no ‘l-jera altro che un posto ndove che i-ricoverea nele stale łe bestie, i leoni, łe tigri, i elefanti, i cameli e tanti cavali. Questo, quando che el circo el-vea el periodo che el-jera in sosta. Ste bestie łe-dovea eśar tegne in movimento e alenae. Da na sosta jera restà un leon che el domator ruśo el vea da adestrar e acudir e soprattutto darghe da magnar na razione de carne ogni giorno par tegnerlo in forma: tra el leon e el domator jera quasi na amicizia drento el serajo. Senonché i schei par ła carne no sempre i-rivea puntuali e cuśì jera par ła só paga – lu el-se giostrea tra ła carne e ła paga che no ła-rivea mai, però ghe piasea tant star in ostaria; a volte par só neceśità el-fea star el leon senza magnar par ndar in ostaria. É capità che no ‘l-ha tegnù conto de quanti giorni che el-vea łasà el leon e quando che ‘l-é entrà drento el serajo par netar el leon, sto qua, stuf de spetar el magnar, ‘l-ha fat da leon e in un minut el- s’ha magnà el domator.

Dopo diverso tempo i-va in zerca del domator, niśuni lo vea vist, gnanca in ostaria, i-ha pensà ch’el-fuśe tornà casa senza dirghe gnent a nuśuni, però drento al serajo jera restà el leon stremà da ła fame che no se-savea da quanti giorni che no ‘l-magnea. I- s’incorze però che é na fibia co un toc de zintura tacada proprio del domator! E na serie de botoni che el leon no ‘l-vea digerì. Jera tut quel che é restà del domator. Sto leon, par punizion (come ch’el-doveśe eśar punì parché carnivoro) l’-é stat copà subito anca par paura ch’el-veśe trovà gusto a magnar carne bianca!